

晨鍾集

晨鐘集

蓮池大師警訓略錄

上海佛學書局印行

中華民國二十四年八月初版

◎ 每冊定價大洋捌分

(外埠酌加郵匯費)

選集者

胡宅梵居士

出版者

佛學書局

代表沈彬翰

總發行所

上海佛學書局

愚園路一五四號

電話三五五二四

分發行所

佛學書局分局

晨鐘集

又名蓮池大師警訓略錄

分銷處

各埠佛經流通處

- (一) 滬西分局：上海麥特赫司脫路電話三二四〇四
- (二) 中區分局：上海山東路福州路電話九二七九九
- (三) 閘北分局：上海閘北新民路中電話四二三四四
- (四) 長沙分局：湖南長沙玉泉街七十一號
- (五) 杭州分局：杭州西湖龍翔橋電話三一一九
- (六) 北平分局：北平東四南大街電話東局二二四四
- (七) 福建分局：福州城內下南路二十四號

晨鐘集

又名蓮池大師警訓略錄

舜水白衣胡宅梵集

庚午夏，避暑五磊，日炙弘師法席，深自慶幸，並將師精選之讀書錄、日省錄付明誠學會刊佈。秋季，師復以手選蕩益大師蓮池大師警訓略錄惠寄，大喜過望，卽郵胡道靜居士乞爲校刊流通，刊將就，滬變陡起，盡毀於火，痛惜無已。去夏，師將蕩益大師警訓略錄重行整理，付佛學書局出版，名曰寒筇集者，乃取杜甫「邊城霜月聽寒筇」意也。復屬梵選蓮池大師警訓以補其闕，顧梵未入佛智，豈敢妄居選政，猶恐有妨師命，勉爲采集，然嘉言之遺，撫寫之訛，還希海內智

識訂正焉。晨鐘命名，亦取諸杜甫「欲覺聞晨鐘」句，并倣師意云爾。二十三年歲次甲戌，六月中澣，時寓沈師橋塘角斗居。

▲竹窗隨筆▼

醉生夢死 醉生夢死，恆言也，實至言也；世人大約貧賤富貴二種，貧賤者固朝忙夕忙，以營衣食，富貴者亦朝忙夕忙以享欲樂，受用不同，其忙一也，忙至死而後已，而心未已也。齎此心以往，而復生，而復忙，而復死，生生生死，昏昏蒙蒙，如醉如夢，經百千劫，曾無了期，朗然獨醒，大丈夫當如是矣。

戒殺 天地生物以供人食，如種種穀，種種果，種種蔬菜，種種水陸珍味，而人又以智巧，餅之，餌之，鹽之，酢之，烹之，炮之，可謂千足萬足，何苦復

將同有血氣，同有子母，同有知覺，覺痛，覺癢，覺生，覺死之物，而殺食之，豈理也哉？尋常說：只要心好，不在齋素。嗟乎！戮其身而啖其肉，天下之言凶心，慘心，毒心，惡心，孰甚焉？好心當在何處？
凡下略者作「」。上略者作「」。上下俱略者作「……」。後仿此。

僧習 末法僧，有習書，習詩，習尺牘語；而是三者，皆士大夫所有事；士大夫捨之不習，而習禪。僧顧攻其所捨，而於己分上一大事因緣，置之度外，何顛倒乃爾？

湯厄一 辛丑春，十日，予隨例入浴，失足沸湯中，從踵及股，既而調治乖方。踰兩月而後愈。雖備歷諸苦，而於苦中照見平日過咎，生大慚愧，發菩提心。蓋平日四大無恙，行坐隨意，眠起隨意，飲食隨意，談笑隨意，不知

其爲人天大福也。安享此福，無復思念六道衆生；且我此一餉安樂時，地獄衆生，挫燒舂磨者，不知經幾許苦矣？餓鬼衆生，飲銅食血者，不知經幾許苦矣？畜生衆生，銜鐵負鞍，刀割鼎烹者，不知經幾許苦矣？縱得爲人，而饑寒逼迫，服役疲勞者，疾病纏綿者，眷屬分離者，刑罰責治者，牢獄監禁者，徵輸困乏者，水溺火焚而死者，蛇螫虎嚙而死者，含冤負枉而死者，其苦亦不知幾許？而我弗知也。自今以後，得一餉安樂，卽當念六道苦惱衆生，攝心正意，願早成道果，普濟含識，俾齊生淨土，得不退轉，剎那自肆，何以上報佛恩，而下酬檀信也。勵之哉！

湯厄二

佛言人命在呼吸間，予平日亦常舉此以警策大眾，而實未嘗身親經歷之也。及予之罹湯厄也，方其入浴，身心安泰，洋洋自如，俄而

蹈沸釜中，幾死矣。其得生者，幸也！龍天救之也！夫爲時刹那耳，而死生係焉。命在呼吸，豈不誠然乎哉？則知爲僧者，於佛所說以勸他人恆切，而以勸自己或疏，通弊也。予於是大愧大駭，而大自戡。

湯厄三

予平日論到病中做工夫處，亦知畢陵伽婆蹉所謂純覺遺身矣。亦知馬大師所謂有不病者矣。亦知永嘉所謂縱遇風力，常坦坦，假饒毒藥，也閒閒矣。亦知肇公所謂，四大本空，五蘊非有矣。及乎足入沸湯，從頭簡點，痛覺在身，誰是遺身者？我今受病，誰是不病者？鋒刀毒藥，切於肌膚，誰是坦坦閒閒者？四大五蘊，實爲吾身，實爲吾累，誰是本空非有者？乃知平日乾慧，都不濟事，若無定力，甘伏死門，彼口頭三昧，祇自瞞耳。噫！可不勉歟。

預了

無常迅速，雖老少無別，然年少人猶處未定之天，妄冀長壽，若老年人，則定然光景無多矣。須把身世事處分了當，從他無常朝到暮到，撒手便行，無所繫累，此晚境大要緊處，不可忽！不可忽！

求人過

見人飭躬立德，名稱頗聞，便多方求覓其過，此忌心也，薄道也。或見人有所著述，其求過也亦然。不知聞一善行，覽一好書，皆當隨喜讚歎，而反掩之滅之，是誠何心哉？若果行係僞行，書係邪書，自應正言公論，明斥其非，又不當半褒半譏，依阿進退。

行脚

予單丁行脚時，忍饑渴，衝寒暑，備歷諸苦，今幸得把茆蓋頭，雖不識修行，而識慚愧。雲水乍到，供事唯勤，己身受用，不敢過分。蓋謂「曾爲浪子偏憐客」，窮漢起家，惜土如金也。今乍入緇門，便住見成菴院，事

事如意，喻似富兒家，不諳民間疾苦，縱才智兼人，無賴參訪，而閉門自大，習成我慢，增長無明，亦所失多矣。

果報一 經言萬法唯心，錯會者，謂無心則無因，無果，故不患有業，唯患有心，有業無心，閻老子其奈我何？遂安意造業，無復顧忌。不知無心有二，如理思惟，用心之極，而自然入於無心三昧者，真無心也。起心造業，又起心制心，強制令無，似得無心，心恰成有心，有則業有，閻老子鐵棒未放汝在。

果報二 又經言，具足智慧菩薩，脫使墮落在畜生中，畜生中王，在餓鬼中，餓鬼中王，錯會者，謂智則能轉業，故不患有業，唯患無智，有業有智，閻老子其奈我何？遂安意造業，無復顧忌，不知經稱智慧，非等閒世智之

謂也。且汝智慧得如文殊身子否？縱不及此，次而下之，得如善星調達否？善星博學十八香象所戴法聚，調達得羅漢神通，而俱不免生陷地獄，況汝智慧未必勝此二人乎？杯水不能熄車薪之火，螢光不能破幽谷之昏，今之小智，滅業幾何，閻老子鐵棒未放汝在。

好樂 人處世各有所好，亦各隨所好以度日而終老，但清濁不同耳；至濁者好財，其次好色，其次好飲，稍清則或好古玩，或好琴棋，或好山水，或好吟咏，又進之，則好讀書，開卷有益，諸好之中，讀書爲勝矣。然此猶世間法；又進之，則好讀內典，又進之，則好淨其心，好至於淨其心，而世出世間之好最勝矣。漸入佳境，如食蔗喻。

念佛不專一

予昔在鍊磨塲中，時方丈謂衆云，中元日當作盂蘭盆

齋，予以爲設供也；俄而無設，唯念佛三日而已。又聞昔有院主爲官司所勾攝，堂中第一座，集衆救護，衆以爲持誦也；亦高聲念佛而已。此二事，迥出常情，有大人作略，眞可師法。彼今之念佛者，名爲專修，至於禱壽命，則藥師經解罪愆，則梁皇懺濟厄難，則消災咒求智慧，則觀音文向之念佛，束之高閣，若無補於事者。不思彼佛壽命無量，况百年壽命乎？不思念彼佛能滅八十億劫生死重罪，况目前罪垢厄難乎？不思彼佛言：「我以智慧光，廣照無央界。」况時人所稱智慧乎？阿伽陀藥，萬病總持，二三其心，莫肯信服，神聖工巧，獨且奈之何哉？

種種法門

譬如王師討伐，臨陣格鬪，以殺賊爲全勝。而殺賊者，或劍，或槊，或鎗，或戟，乃至矢石，種種隨用，唯貴精於一技而已。以例學人，則無

明惑障，如彼賊人，種種法門，如劍槊等，破滅惑障，如獲全勝，是知無論殺具，但取殺賊，賊既殺已，大事斯畢，所云殺具，皆過河筏耳。不務其大，而沾沾焉謂劍能殺人，槊不能殺，豈理也哉？參禪者，譏念佛爲著相，勵行者，呵修定爲落空，亦猶是也。故經云：「歸元無二理，方便有多門。」先德云：「如人涉遠，以到爲期，不取途中，強分難易。」

▲竹窗二筆▼

雁蕩山 台雁號兩浙名山，而雁蕩尤奇，有輕千里裹糧而往遊者。予昔應太平之請，去雁蕩僅一由旬，期滿，院主白予爲雁蕩遊，予欲往，而忻然從遊者百餘衆，因計彼山久無接待，徘徊歷覽，往返不下半月，費粟數石，院貧不能支，遂堅執已之，衆怏怏，乃慰之曰：雁蕩之勝，在震旦中尙有

過之者，卽震旦最勝處不及天宮，天宮展轉最勝處，不及西方極樂世界，公等不慕極樂，而沾沾雁蕩之慕何也？竟不去！

好古一 數輩好古者，羣居一堂，各出其古以相角，有出元宋五季時

物者，衆相與目笑之；已而唐，已而晉，而漢，而秦，而三代，恨不得高辛之鑑，燧人之鑽，神農之琴，太昊之瑟，女媧氏所煉五色石之餘也。一人曰：諸君所畜誠古矣，非太古也，非太古之太古也。衆曰：然則日月乎？曰：未古也。有天地然後有日月。然則天地乎？曰：未古也。有虛空然後有天地。然則虛空乎？曰：未古也。吾所畜日月未生，天地未立，空劫以前物也。諸君不吝千金，以博一爐，一瓶，一書，一畫，而不知寶其最古，亦惑矣。衆相視無語。

好古二 俄而曰：子之古人所同也，非子所獨也。奚貴焉？曰：同有之，同

迷之，迷則不異於無；雖謂吾所獨，非過也。曰：吾輩之古，歷歷可觀，子之古安在？其人展兩手示之，衆復相視無語。

人身難得 一失人身，萬劫不復。此語誰不知之，知之而漫不加意，與不知同。昔須達爲佛營室，佛視地上螻蟻而謂達言：此蟻毗婆尸佛以來，經今七佛，尙在蟻身。夫一佛出世，歷年甚久，矧曰七乎？釋迦而後，過五百餘萬歲，而慈氏下生，名第八佛，未知此蟻脫故身否？縱脫蟻身，未知何日當得人身也。今徒見舉目世人，比肩相摩，而不知得之之難如是；旣得人身，漠然空過，真可痛惜。予之懈怠空過，不能不深自痛惜，而併以告夫同志者。

繼祖傳燈

世有恆言：凡大徹大悟，繼祖傳燈，續佛慧命者，須是三朝

天子福，七代狀元才始得。斯言似過，而理實然。昔中峯老人，謂無量劫來生死，今日要與和盤翻轉，豈易事哉？是故十善始得生天，人空方證小果，久積萬行菩薩，尙不免曝顯龍門，則三朝七代猶近言之也。主六合，魁多士，猶小喻也。極之，蓋不可思議功德智慧之所成就也。雖然，亦烏可以難自諉，而付之絕望乎？但決心精進，逢魔不退，遇難轉堅，研窮至理，以悟爲則，不患無相應時節，何以故？以宿世善根難測故。

悟道難爲善易

當此五濁末世，兼以多生積習，而欲斷無明惑，悟自

本心，則千萬人中，希得一二，亦無足怪。至於不爲惡而爲善，此亦易事，而甘爲不善，吾不知其何心？又復心口意三欲，令攝意不動，不出入無時，起滅無形，定力之難成，亦無足怪。至於制身不爲惡事，制口不發惡言，此亦

易事，而甘爲身口之惡，吾不知其何心。

淨土難信之法

華藏第十，主藥神，得念佛滅一切衆生病解脫門，清

涼疏謂趣稱一佛，三昧易成，敬一心濃，餘盡然矣。况心凝覺路，闍蹈大方者哉。前數語弘讚專念，後二句入理深談，誰謂淨土淺也。行願品廣陳不可說世界海，不可說佛菩薩功德，臨終乃不求生華藏，而求生極樂，誰謂淨土淺也。聖賢垂訓如是，而人自淺之，佛言難信之法，不其然乎？

世智辯聰有失

世人重聰明，誇博洽，競辭采，然不足恃者，以其有失

也。彼學窮百家，文蓋一世，有來生不識一字者。其甚如淳禪師以才藻著名，一跌而起，頓成癡呆，則不待來生。又甚化爲異類，則所謂但念水草，餘無所知，其可恃安在？惟般若真智，蘊之八識田中，亙古今擲撲不破，縱在